

<http://www.klix.ba/vijesti/bih/ovogodisnji-tea-fest-u-sarajevu-u-znaku-ljekovite-biljke-smilje/140614127>

Ovogodišnji Tea Fest u Sarajevu u znaku ljekovite biljke smilje

Na Trgu oslobođenja - Alija Izetbegovic u Sarajevu od 11. do 15. juna održava se 12. tea fest, čiji je fokus stavljen na uzgoj ljekovitog bilja za kojim postoji tržišni interes.



Foto: Arhiv/Klix.ba

Među izlagačima na Tea festu nalaze se "Lamaruž" s kremama, sapunima i hidrolatima na bazi smilja, a "AlmaDerm" Kladanj na svom štandu ima i eterično ulje smilja, koje proizvodi "Helita" iz Širokog Brijega. Bočica od pet ml ovog ulja košta 20 KM, dok je za istu količinu njegova cijena u Americi u maloprodaji od 50 do 70 KM.

Ovogodišnji Festival čaja i ljekovitog bilja održava se "rame uz rame" sa Zmajevim gnijezdom, mjestom predviđenom za gledanje utakmica Svjetskog nogometnog prvenstva.

Jednoj izuzetnoj biljci na festivalu je poklonjena posebna pažnja - smilju, po čijoj proizvodnji je BiH vice-prvak na svijetu, poslije Francuske koja je tržišni lider.

Ulje smilja je dragocjen sastojak u prirodnoj kozmetici, zbog regenerativnih svojstava i

blagotvornog učinka na bolnu i zapaljenu kožu, a kreme s ovim uljem su svjetski hit u anti-age kozmetici.

Ovo "hercegovačko zlato" čije se visokovrijedno ulje uspješno izvozi u Evropu i Ameriku, dobilo je posebnu pažnju na ovogodišnjem festivalu čaja i ljekovitog bilja "Tea Fest".

Zbog velike potražnje na svjetskom tržištu i činjenice da je smilje sa Balkana jedno od najkvalitetnijih na svijetu, stvoren je ogroman pritisak na prirodna staništa smilja u Hercegovini. U nekim područjima istočne Hercegovine smilje je već vrlo teško pronaći.

Srećom, određeni broj kompanija počeo je s uzgojem smilja, koristeći sjeme iz prirode. S obzirom da smilje traži kamenite terene, priprema zemljišta je izuzetno skupa.

Uprkos tome, prema analizama USAID/Sida FARMA projekta BiH će za manje od pet godina uzgojenim smiljem potpuno nadomjestiti količine koje danas uzima iz prirode, čime će se očuvati prirodni biodiverzitet i postići održivost u proizvodnji ulja.

Među tridesetak ovogodišnjih izlagača na Tea Festu predstavlja se i nekoliko kompanija koje u ponudi imaju proizvode od smilja - eterična ulja, sapune, dnevne i noćne kreme, hidrolate i druge pripravke za njegu kože.

Projekt Tea Festa podržali su Općina Centar Sarajevo i Federalno ministarstvo okoliša i turizma FBiH, saopćeno je iz Press službe Festivala.
(FENA)